

四庫全書

史部

欽定四庫全書

史部
浙江通志卷二十二

詳校官給事中臣戴璐

檢討臣德生覆勘

總校官編修臣倉聖脉

校對官學正臣湯垣

謄錄監生臣劉廷勲

欽定四庫全書

浙江通志卷二十二

形勝

周禮有司險之掌凡山林川澤之阻咸周知之所
以順地利而奠民生也兩浙環地數千里江山四
塞雖金城天塹何以加茲

聖朝德孚寰宇衆志成城所恃以鞏金湯者不徒在險
而慎固封守必因地利則形勢宜審焉志形勝

浙江全省

周禮職方氏東南曰揚州其山鎮曰會稽數曰具區
川曰三江浸曰五湖

國語吳之與越三江環之

越絕書吳越為鄰同俗并土西州大江東絕大海兩
邦同城相亞門戶

吳越春秋東至於句甬西至於檣李南至於姑末北
至於平原

史記貨殖傳浙江南則越東有海鹽之饒章山之銅
三江五湖之利亦江東一都會也

漢書嚴助傳會稽東接於海南近諸越北枕大江
晉書諸葛恢傳今之會稽昔之關中

左思吳都賦江湖陂險物產殷充

唐書天文志自南河下流南涉江淮為吳越負海之
國貨殖之所阜也

宋史地理志東際海西控震澤北又濱於海

蘇軾表忠觀碑吳越地方千里帶甲十萬鑄山煮海
象犀珠玉之富甲天下大城其居包絡山川左江
右湖控引島蠻

歐陽元江浙行省興造記北枕江淮西放彭蠡南極
於海供給當天下半

圖書編浙江古揚州地崇山巨嶺所在限隔然嘉湖
與江淮相表裏嚴衢以徽饒為郭郭左信都右閩
闕大海東蟠繞出淮揚之域四通八達之區也

嘉靖浙江通志維浙隨山坵土積岨盤岡瀦為大澤
環以巨海維浙西山導自天目西北折於卞山南
達於富春峯巒起伏雲矗霄馳越垂雷踰百大萃
於餘杭之徑山錢唐之龍山東北達於金牛以入
於澣浦諸山維浙東山導自江郎泉山浮蓋至於
翠光岑山爛柯東北折至於黥山九際臺湖縉雲
大陽金華覆盆大盆至於東北勾乘玉京秦望會
稽東過嵯山天姥達於天台華頂北至回明太白

東折於蛟門虎蹲峙為海門西達於括蒼少微至
於大梁南田大羅天臺底於雁蕩橫為海嶠維浙
源西南導澱水合東白大盆之源出為婺水至於
蘭溪東南導烏傷東白大盆之陽東流為浣浦西
絡漁浦皆北流以入於江開化壽昌導歙西來流
入於江導新安水自遂昌達淳安絕分水水下於桐
溪紫溪導天目之南過新城下富陽皆東南流以
入於江天目導苕瀝為霅溪入於具區括蒼導洄

溪出於青田東南至永嘉匯為廣江過飛雲橫陽
而入於海導剡溪合東小江踰東江為曹娥之水
達於海四明導姚江東帶慈谿達於鄞江傳於大
浹入於海浙之山川茲其大都云

萬厯杭州府志壤地千里山川序列遐邇錯布道路
四達

方輿紀要崇山巨浸包絡四維

舊浙江通志浙江析揚之南跨閩之北梅嶺僊霞為

咽喉具區三江為藩蔽龕赭虎蹲松門大羅為門
戶龍鬬蒼嶺為屏障

舊浙江通志環地數千里聯絡江海郡邑之間莫不
倚高阻深置亭列障而僊霞一山為入閩孔道尤
有一夫當關之勢

杭州府

錢塘縣

附郭

仁和縣

附郭

水經浙江經其南

范仲淹知杭州謝表江海上游東南巨屏

蔡襄雙門記杭於浙為大州提支郡數十道通四方
海外諸國

蘇軾六井記潮水避錢塘而東擊西陵所從來遠矣
沮洳斥鹵化為桑麻之區久乃為城邑聚落凡今
州之平陸皆江之故地

程琬淨慈羅漢堂記有濕紅映地飛翠侵霄簷轉鸞

翎堦排鴈齒星垂珠網寶殿洞乎琉璃日耀璇題
金椽聳乎玳瑁

楊簡莫能名齋記東望大江巨濤際天西望錢湖玉
潔如鏡

程玘三賢堂記眷言吳越之中夙號東南之盛雲擁
雉堞侵漢連霄鱗比坊衢飛塵踏霧

李良民順濟廟記南薄海門江水浩淼無際天這是
險以示東南形勢

程史行都之山肇自天目清淑扶輿之氣鍾而為

吳

葛澧錢塘賦據東南之都會號繁盛之樂土山川秀
麗井邑浩穰周袤連亘五十餘里虎踞鱗伏羅峯
列岫內足以衛居止外足以禦戎寇

盧襄西征記杭州橫空列城為國大藩羣水赴衆山
截

裴伯宣浙江潮候圖說龍山踞其首西湖蟠其腹

天竺聳其肩東山臥其背遠引甌閩而近控吳越

楊孟瑛開西湖路疏南跨吳山北兜武林左帶長江
右隣湖曲山停水聚元氣融結

西湖游覽志山奔水導而逆以海潮則氣脈不解故
東南雄藩形勢浩偉生聚繁茂

徐渭鎮海樓記城跨湖山其四面有名山大海江湖
潮汐之勝一望蒼茫可數百里至於島嶼浩

渺亦宛在掌股之間高者長蹇真有俯壓百蠻之氣

舊浙江通志錢塘天目西來龍飛鳳舞右臨湖曲左帶長江形勢壯於東南山川甲於郡國仁和外帶江海內抱湖山浙右名區南隣句踐北枕閩閩

海寧縣

釋贊寧重修志愿寺序錢塘屬邑鹽官為最有浙之

朝陽為吳之右辟白鋪江練青點海門

元史地里記海寧東南皆濱巨海

舊浙江通志邑據三吳上游邊臨大海文堂峽石之對峙黃灣石墩之聯綿

海寧縣志東俯滄溟西極沃壤南為藩郡之股肱北作崇祠之屏蔽

富陽縣

葉廣居城隍廟記濤江抗其陽羣山走其陰雉堞周

宏淵渟渚列

陳觀吳公隄記居杭上游背山而江下通錢塘潮汐
往來上接衢婺歙諸水會流每天風撼濤奔湧
激射號為險絕

張居傑城隍廟記形勝雄偉風氣完厚長江縈帶乎
南羣山旋繞乎北高城深隍山水自然之險

餘杭縣

洪容夔餘杭縣署記餘杭苕霅之津會

嘉靖餘杭縣志西去九十里皆深山大谷崎嶇險峻
中有平壤流泉冬夏不竭自南以東地漸寬衍諸
水支脈通接

戴日強南湖記苕溪去縣治不數武橫不越尋丈上
接天目下通武林吳興嘉禾諸郡邑天目萬山之
水支分派合會歸於此

陳善南湖考餘杭居天目萬山之下

扈大亮陳明府君廟記大溪橫截衆水合流

臨安縣

蔡襄遊徑山記假松之南一目千里吳江之濤可挹
越岫之桂可攀

蘇軾表忠觀碑天目之山苔水出焉龍飛鳳舞萃於
臨安

黃鼎象臨安縣舊志序山璫瓏九折自東天目之勝
迤北而通徑山幽邃奇曠吳越希有其水為苔溪
合九水雲源碧澗相映帶

臨安縣志東有天柱西有天目前有石鏡後有凌霄

新城縣

羅隱東安城記大藩襟帶

許自譙樓記邑在叢山石齒間

孫清新城縣學記山迴以秀水繞以清

謝夢生新城縣學記白道穿村清溪照郭山有千丈
之高懸水有七溪之交織

新城縣志四面皆山二溪合注以達於江險阻之區

於潛縣

水經注於潛縣北山極高峻嵯嶺竦疊東南連山挾
水兩峯對峙反項對石往往相捍

邵文炳興復水利記崇岡峻嶺回繞重列水之發於
山三十六源

張崑玉岵嶧山記武林山脈發源天目潛邑適踞其
麓枕西目為屏障綿亘極天中藏峭壁絕巘詭奇
不可殫述

舊浙江通志金樓南峙岿西園

於潛縣志九鎖交陳雙峯對峙

於潛縣志潛為山國岡巒盤錯川原紆迴衮衍廣輪

甲於省會大縣

昌化縣

王緯昱嶺關銘序昱嶺在杭徽之交因山為險與千
秋獨松稱三關而三關莫險於昱嶺

錢錢樵樓記昌邑僻介萬山中山深而水縈

華文甫昌化縣志序重山疊嶂南北要津江浙襟喉

萬厯昌化縣志東連省會西接徽饒高山崇嶺率隸
抽天培塿崦嵫起伏綿亘彌望皆是

昌化縣志紫微銅坑峙其東南千秋黃花枕其西北
邃壑深溪環列四塞

嘉興府

嘉興縣

附郭

秀水縣

附郭

水經注柴辟吳楚之戰地備候於此故謂之辟塞
是以越絕稱吳故從由拳辟塞渡會稽湊山
陰

郁皋老建興寺碑左控姑蘇右接毘陵

陳世昌南湖賦東會吳淞西控禦兒支流旁達聯
絡相維良田沃衍灌木叢泓溝塍綺錯原隰縱
橫

方輿勝覽封圻廣袤是為攜李之區井田豐登庸表
嘉禾之瑞

貝瓊環碧堂記攜李幽湖自南湖來洄而為狀旋而
為渦至是左右回抱青停黛蓄尤形勝之所萃
焉

弘治嘉興府志巨海環其東南具區浸其西北左杭
右蘇襟江控湖四望如砥海濱廣斥鹽田相望鎮
海諸山隱隱列拱百川環繞而鴛鴦一湖亭蓄其

南誠為澤國之雄東南一大都會也

屠中孚嘉興縣志序距濱海滬大澤控峯泖引錢塘
延袤廣輪幾及千里

李貞開煙雨樓賦控壓吳岫彈赫越疆南引會稽以
潏滙北連震澤以清滂

許煥烟雨樓詩序鄉名醉李邑號嘉禾控天目而引
具區帶諸溪而枕滄海

舊浙江通志嘉興居山澤相錯之介迺吳越交戰之

區秀水東會滬瀆西控語溪襟帶具區獨攬具秀

嘉善縣

姚弘謨築城碑記三吳門戶通海臨御

萬厯嘉善縣志地當江浙之交為古吳興區北枕長
洲東接吳淞西連震澤其幅員雖不甚廣而控馭
遠矣

海鹽縣

弘治嘉興府志大海環其東南諸山踞乎左右西引

苔溪北控吳淞河水百折縈迴甫田一望如掌

王穉登海鹽城記維此鹽官聿稱巖邑輔橋李而作
鎮枕滄溟以奠域

海鹽縣圖經鹽故疆前浙汜後淞浦至寥廓矣秦駐
山縣之主山體既雄拔峯尤遠秀山脚半插海中
海鹽縣志秦駐山獨秀聳長牆石帆紫雲金粟參差
環列登高南望翠屏青戟奇峭千狀而俯瞰雲濤
浩然東際一碧萬里亦大形勝也

石門縣

沈括崇德縣學記崇德居山澤之介孔道四出墟壠

網絡

祝文彥語溪學宮賦地當浙右土號上腴脈發崑崙

乳長天目茗水出其南雲水拱其北

舊浙江通志左玉灣右金鷺南枕皋亭北通震澤走
馬為吳越分疆之地語兒乃吳人棲兵之所

平湖縣

陸杲東湖戲珠亭記九水洋洋會而為湖山川靈淑
之氣所鍾

過銘簋九山志序乍浦海岫巋然九峯列峙以扼南
溪之衝

舊浙江通志九山列其南三泖匯其北溪塘接其西
滄海瀕其東蔽金山於右翼海鹽於左

桐鄉縣

弘治嘉興府志四境皆平疇環以支港負具區面海

鹽東接秀水西連玉溪

桐鄉縣志地多平衍無名山大川然地脈盤旋發源者遠一丘一壑不可謂非三吳秀麗之所毓也

湖州府

烏程縣

附郭

歸安縣

附郭

越絕書太湖周三萬六千頃其千頃烏程也

顧況湖州刺史廳壁記江表大郡吳興為一山澤所

通舟車所會

元和郡縣志五湖之表

倪思經鉏堂記雪川平波漫流有水之利而無水之
害羣山秀氣可掬城中二溪橫貫此天下所無也
李直方白蘋亭記吳江之南震澤之陰幅員千里基
布九邑弁山屈盤而為之鎖五溪叢流以導其氣
魯伯能東禪寺記崇巒遠峯盤礴秀氣深澤碧灣曲
折浚流其流出於天目以入苕雪山澤之勢雄深

秀拔

葉適北村記天下山水之美吳興特為第一其山脈
地絡融液而浸灌者莫非氣之至清淳止演漾澄
瑩紺澈數百千里

趙孟頫吳興賦蒼峯北峙羣山西迤雙溪夾流泓渟
皎澈山川映發沖和攸集星列乎斗野勢雄乎楚
越

宇文公諒府治記吳興為東南望郡天目分秀雙溪

合流金蓋諸峯峙其陽蒼弁具區亘其陰

貝瓊西翠樓記吳興七十二弁連延若海濤起伏

潘士遴康山壩記峙隱包秀樓賢居其陰康山居其
陽兩山環抱回固蹉蹉

范公桀重建溪光亭記吳興僻處東南山水之秀以
清遠聞苔雪二溪交流蜿蜒一瀉二百里許而達
於震澤四山環拱羅列光景冥晦昔人以水晶宮
稱之

劉麟逸老堂記郡城蹲踞弁山三川五浸布護其北
天目諸峯蒼翠於南其陂塘沿渚循山而下者漸
廣諸山環繞者漸近漸伏道場卓益二山又南扼
諸水導漾其中

王叔承道場山集序郡之南峻峯迴嶺樹剝雲霄控
五湖引苔雪瞰武林天目鬱鬱巨麗西吳最勝
舊浙江通志烏程五溪迎碧萬疇園青疊障右環太
湖後枕坡公賦峴山之句司馬有嘉郡之稱歸安

虎疊千巒龍灣百灌舍山隱起浮玉參差覩山水
之清遠真東吳之善地

烏程縣志烏程山脈發於天目南支由武康北支由
長興入境西北迤南巒嶂層突勢若遊龍散而之
東則點點星羅天然圖畫

陸幼學峴山逸老堂社田記峴山首峙郡城南道場
車蓋諸峯如簪筆几案碧湖如鑑浮玉如螺蕩漾
岩嶢於空明藻荇間

歸安縣志東潯港西餘不南含塘北運河流環而生
氣結前含山後飛英右東林左烏鎮秀列而人文
開

張邦彥浙西水災疏湖州水壑也雖與杭嘉稱為唇
齒之郡然杭則上流也嘉則杭之分流也至於湖
則兩引天目諸山之水獨匯於太湖辟則釜底也
長興縣志長興之水自南來者於梅溪入境為苕溪
自西南來者為四安港從西來者為合溪俱經縣

治東注其從水口者則徑往東北而皆流入於太湖

謹按太湖在禹貢曰震澤在周禮曰具區周圍八百餘里界連江南之蘇州府常州府浙江之湖州府嘉興府綿跨兩省東曰大錢湖北曰小梅港大錢以東瀉水之口凡二十八小梅以北瀉水之口凡八合遠近諸溪瀆俱以太湖為壑湖面遶潤支港繁多最難防禦而大錢一口左控蘇常右枕杭嘉汪洋浩漭順風揚帆直趨武林實為浙西咽喉要地

本朝雍正四年
特准督撫會

題於大錢等汛添設弁員彈壓巡查洵為控制得宜
澤國藩維永固封守矣故特指出以補舊志所略

云

長興縣

萬厯湖州府志遙連天目雄據太湖三箬以導其流
五峯以挹其秀舟車鱗集水陸要衝

長興縣志長興之山俱發自天目最高者莫如方山
而弁山雄據下流邑境之內當以方山為嶽弁山為
鎮

德清縣

王禕德清縣治記德清隸湖為壯縣縣治臨餘不溪
後枕金鰲諸山山明水秀

胡友信德清縣築城記德清為省西門戶水關之勝
壯於兩浙

虞徽吳羌山高士菴碑記縣治前有山聳然而峙者
乾元也升椒而望萬象軒露其西北金鵞市亭諸
峯或虎蹲而拱或鳥企而張又南近天目餘杭諸
水蜿蜒襟帶於其前山川之勝於焉為冠

許孚遠德清山館記德清四山崢嶸列峙若四維金
鷺乾元百寮支脈盤旋橫於襟帶之間遠近峯巒
森羅如畫

舊浙江通志近案丁山遠朝望洛橫接北流前挹清
溪城山峙於西南乾元高於吳隅

武康縣

萬厯湖州府志武康之山起天目之陰今縣坐烏回
其所也封禺古址亦其所也

舊浙江通志封禺橫障英溪分流石城西峙黃壠東
蹲馬頭高擁於南烏回盤旋於北

安吉州

魯伯能東禪寺記屏山九疊鏡水千尋

萬厯湖州府志天目為江南諸山之雄而當其前茗
溪為吳興諸水之秀而環其後獨松幽嶺關鍵乎
東南玉磬金鐘藩屏乎西北

伍餘福北川橋記州匝萬山獨一川百折而東

孝豐縣

王珣孝豐縣創縣碑記東至武康西接寧國南控餘杭北引安吉鳳凰峙其左大陽鎮其右京山拱案於前大會屏障於後廣苔諸水出天目浮玉自西南而來環繞於東北山谷盤固川澤浩渺實天造地設一形勝也

黃朝選豐北閣記孝豐踞天目之勝苔水環流而北五山渡當其水口為縣要津

孝豐縣志天目為東南之鎮茗水為震澤之源其他
卷石勺水絕壑幽巖難以名似誠山水之奧區也

寧波府

鄞縣附郭

陸雲答車茂安書西有大湖北有名山南有林澤東
臨巨海放船長驅一舉千里北接青徐東洞交廣
不可勝名

周鰲寶積寺記四明與天台並高東接滄溟西連禹

穴穹窿盤薄凡數百里

楊業引水記太湖漫其西南大江帶其西北

王應麟七觀對修眉於天姥接五界於金庭東泊青
微南薄朱垠

四明圖經抱負滄海枕山臂江

方輿勝覽明之為州乃海道輻輳之地南接閩廣北
控高麗商舶往來物貨豐衍東出定海有蛟門虎
蹲天設之險亦東南要會也

貝瓊送顧伯載歸四明序海門潮汐雷奔雪湧彷彿
激萬弩而西

嘉靖寧波府志內外二江潮汐吞吐支流緒派包絡
市廛登邑而望江南諸山懸青獻碧拱若玉屏

張時徹四明形勝賦丹山赤水之洞天方丈蓬萊之
仙島鄮峯凭玉几之高雪竇瞰金莪之好松風甘
里天童瑞應於長庚寶璫千尋舍利光騰於晴昊
虹橋壓水雉堞連雲樓臺突兀金碧嶙峋

潘夢良三江亭記大江橫其前羣山拱其外島嶼出沒雲煙有無浪泊風帆來自天際

余寅鄞縣學記惟鄞負滄海之沃若奠名山之崔嵬爰晶爰灝是稱阜藩

舊浙江通志四明廣袤限隔台越陽堂霞嶼盤鬱龍葱

鄞縣志縣之東西北三面皆山前橫三江江之南羣山來朝蒼翠迴環

慈谿縣

馮益清道觀記慈谿為縣三面阻山而不足於南其
縣陰諸峯巍偉秀拔迤而左旋若舞鳳若驚龍或
起或偃達於吳隅而止

劉伯淵寶城菴山田碑記慈枕山為邑五曜歸垣九
龍迴合兌位寶山岼然翼蔽于青霄而蔽白日隱
然室有障車有屏也

舊浙江通志憑高原而廣野九嶺騰驤二江吞吐東

據鷓鴣之浦北枕黃牛之山

奉化縣

戴表元奉川驛記包山根江而掖海其形望於明州
貝瓊宜晚堂記奉化地勢斗絕四山環拱而南屏一
峯嶄然特起又有日峯峙其左剡水紆其右蓋四
明形勝之一

貝瓊擁翠樓記四明之奉化依山為縣大山橫亘於
南者玉几寶麓西則為石棋盤東曰金鷲東南龍

潭上峭壁千仞曰南山北則青錦嶺然與玉几對峙其或起或伏或前或却爭奇獻秀不啻海濤湧而石筍列

袁大誠湖頭巡司碑記奉川三面阻山陸之固惟東南則枕海

嘉靖寧波府志奉化山發於新嵒水歸於定象右則華頂雄起秀參晴昊左則金鐘逆峙勢抵中流前則文峯玉几而西山南山奠於坤吳之位後則蓮

巖錦屏而銅山金我應於乾艮之位

奉化縣志陸走緱城舟通董水百里提封秀壤相錯
乃行李東道甬越襟喉

鎮海縣

陸雲答車茂安書定當郡之咽喉環以長江滙以溟
渤達蓬嶽業而東趨伏龍蜿蜒而南首盤輿據三
十六盤之勝瑞巖逞十有二峯之奇

嘉靖定海縣志後霸大嵩阻其南而與錢爵昌國為

聲援龍山管界殿其後而連觀海慈谿為犄角

史大成招寶山寶陀寺記其南玉環烏沙普陀諸山如浴鳧浮鷗滅沒於洪波駭浪之中而台溫往來之程指顧可得其北一望陳錢壁下為南浙分界蘇松沿海諸郡可以一帆飛渡其東則岑江螺峯固昔時駐兵之所用以控扼海道其西循龍山澤山之麓迤邐而轉可達杭越聲息甚捷

舊浙江通志蛟門虎蹲重關寶天設之險查浦峽口

抗扼乃咽喉之地

象山縣

脣浙江通志東接扶桑西連甌閩天門如闕鼓吹若
轟乃水陸之要衝真大觀之勝槩

象山縣志象環邑皆山其山脈來自天台蜿蜒數百
里重巒疊障隱見起伏膏腴之田彌望繡錯東接
扶桑南抵琉球西連甌閩此其大觀也

象山縣志象介在海壖為明州要地固屏翰之襟喉

定海縣

吳萊甬東山水古蹟記昌國古會稽海東洲也東控
三韓日本北抵登萊海泗

嘉靖寧波府志南通甌越北涉江淮皆以南北兩洋
為要會而南北之哨則以舟山為根柢

定海縣志翁山孤懸海中據險而成邑

定海縣志地居險阨海防戒嚴

劉慶寶陀寺碑記浙江慶元之昌國有山名補怛落

伽者奇巒幽嶂邃洞靈巖錯立層出奔濤駭浪之
中潮汐吞吐雲霞變幻

謹按昔陀山雄峙東溟四面際海北渡為沈家門
居定海之東相去二潮乃寧紹二府之外藩也過
此則蓮花洋外則陳錢馬蹟羊山大衢諸山皆孤
懸海面探峭莫及故外洋貢舶商艘多泊於此實
為海疆門戶出入要津明湯和設立水寨屯兵置
艦以禦倭警與馬墓長塗浙西兵船相為犄角
聖朝德威遐播海不揚波凡商民之詣普陀者皆安流
順渡而特於沈家門增設官兵以時防禦蓋有備
無患可謂扼
形勢之要云

紹興府

山陰縣

附郭

會稽縣

附郭

越絕書西則迫江東則薄海

吳地記南面連山萬重北帶滄海千里

世說新語千巖競秀萬壑爭流草木蒙籠其上若雲

興霞蔚從山陰道上行山川自相映發使人應接

不暇

白居易沃洲山真覺寺記東南山水越為首剡為面

沃州天姥為眉目

杜牧浙東觀察使制西界浙河東奄左海提封七州
王十朋會稽風俗賦因種山而中宅擴蠡城而外周
龍樓翼而乾峙石竇伏而巽流實東南之大府號
天下之無公

王十朋蓬萊閣賦周覽城闔鱗鱗萬戶龍吐成珠龜
伏東武三峯鼎峙列障屏布棟宇崢嶸舟車旁午
壯百雉之巍垣鎮六州而開府

葉適新置二莊記會稽為鎮山越之奇勝峻特擅於
東南

寶慶會稽續志襟海帶江方制千里

方輿勝覽鑑水環其前臥龍擁其後稽山出其東秦
望直其南

黃潛雲門集後序浙東皆以山水為州越中禹穴秦
望天姥四明五洩東山蘭亭鑑湖剡溪幽阻峻極
人跡罕通

劉基遊雲門記會稽有層巒複岡而無梯磴攀陟之勞有大湖長溪而無激衝漂覆之虞

於越新編山陰峯嶂絳列於左右澄江巨湖經流其中東環娥江北遶大海南接杉嶺西倚山陰東南扼嵎山西南阻駐日

舊浙江通志山陰負塗山而蘭亭秦望南屹滄海北環會稽禹陵前峙甬山後拱遶門中含娥江外附山陰縣志三江海門山磧地當尾閭為三邑之水口

萬川會流洩之易如建瓴

謹按三江瀦湖導海萬壑匯流旁則馬鞍駝峯諸山拱峙爲護而陡巖石峽嵌東激湍奔騰直與龕赭小巖形勢相埒實爲東越外藩海門後衛至早濬蓄洩利益民生則詳見於水利云

蕭山縣

莫濟蕭山縣學記浙河以東郡縣連城數十蕭山人徒之衆覺宇之壯舟車之雜集大哉縣也

陳益公接待院記蕭山西興鎮據錢塘要衝兩浙往來一都會

劉基武佑廟記餘暨東北百里為蕭山縣其山曰北
幹之山浙水帶其陰湘湖滙其陽東望會稽至於
大海日之所出

於越新編揖秦望為後蔽聳天目為前屏險據錢塘
利開湘湖北幹明月佳山青蕖

蕭山縣志東抵錢清南盡勞嶺西至莊亭北限海門
四圍皆江海之大其山如北幹霧樓西山千巖萬
壑不減蓬島之麗其水如湘湖漁浦諸水雖西湖

鑑湖之勝何以踰之

諸暨縣

鄧謐大沼湖圩閘記暨處萬山之會臨江滙之濱

於越新編諸暨白茅外屏則鐵崖之菰諸山長山外
屏則五洩陽堂諸山而東白為東南之崑崙五指
鎮為西南之門戶道林紫巖諸山為北東西之護
衛

諸浙江通志五洩爭奇羣湖瀉曜長山挂榜浣江拖

練外屏杭烏之寵從內案亭蘿之森秀

餘姚縣

貝瓊受日軒記姚江襟山負海

於越新編波濤觸天渺若瀛海南起崇山高峻天表
北際溟海橫截地維北望豐山若馳而南融為秘
圖姚江界其胸臆竹山西石鎮其中流龍泉二黃
參衛拱翼而容星秀表經緯諸湖南北山海更復
壯嚴蓋山之交水之會風氣之委藏也

舊浙江通志四明南列巨海北滙東接蛟門西通曹
渡長江制其區宇巨浸帶其封域

上虞縣

方輿勝覽上虞東山巋然出衆峯間如鸞飛鳳
舞

貝瓊竹深處記上虞東南諸峯旁列前起若金
芙蕖萬朶而朝嵐夕翠可覽於江雲海雨之
外

於越新編左舜江右姚江南帶溪北負海河橫厥中
亘三十里山則百樓拱前五癸峙後嶙峋闢奇不
厭拄笏而羣峯蜿蜒自西而東周遭矗矗若雉堞
然

上虞縣志舜封舊壤延袤百里襟帶長江面山負海
金壘檀燕僊人之都居釣臺東山名賢之古宅湖
光練明海岸霜白誠越邑之巨麗也

嵊縣

水經注嶠山與嵎山接二山雖曰異縣而峯嶺相連
其間傾澗懷煙泉溪引霧吹畦風馨觸岫延賞是
以王元琳謂之神明境

王銍嵎縣學記嵎西南隅羣峯之麓下臨剡溪山川
環拱氣象雄張

天中記東則天台桐柏方石太平二韭四明五奧三
菁表神異於緯牒驗感應於慶靈連岡則積嶺以
隱嶙舉峯則羣竦以截薛

新昌縣

余則全東堤記邑治面山負壑川流斗注

王畿甲科題名碑記分台割剡溪山環麗

呂光洵城池碑記縣所治地東界瀕海西帶剡江有

崇岡峭壁絕壑叢林之險

新昌縣志南接駝峯北依五馬祥溪環東旗鼓峙西

天姥沃洲之祕南明濂洞之幽

台州府

臨海縣 附郭

崔尚桐柏山碑藐彼天台蹇我崔巍下臨滄海遙望
蓬萊西鎖括蒼北連關嶺盤山南固桐巖東阻亦
一方之險也

呂祖謙重修臨海縣城記臨海郡南東西三方岸江
湖秋水時至北限大江威不得騁

尤袤玉霄亭記州南西北三面逼山獨東望諸峯差
遠雲煙空濛外際溟海

周潤祖捍城江岸記台襟江帶河南匯為龍湫盤石
踞江面西南萬壑水至直擣盤石怒濤橫噬城下
與潮汐關

謝鐸赤城志序城踞大固山介天台括蒼間中峯對
峙如入几席天台仙居二水別流至三江口而合
縈紆演迤環拱其郭巖光川容吞吐掩映於煙雲
縹緲之際真足以奠城社表宅里聚廛市以雄跨
一方

康彥民志復亭記 台山跨據海隅天儲其精地聳其
藏支分蔓延襟帶千里

舊浙江通志 距海百餘里 中山對峙於南北三峯角
立於東西二固險絕雄跨一方

天台縣志十一郡惟台最據險西南二面臨大江西
北巉巖參箭插天如蠶叢鳥道一人扼險萬夫莫
過

黃巖縣

舊浙江通志 瀕海帶江羣山環峙永寧左抱委羽前
列險於松門阻於靈石中抱沃野氣象宏壯

天台縣

吳子良江東天籟序天台縣山所盤薄巔頂入霄漢
雲氣與滄洲相吞吐

陳音登科題名記天台山磅礴數百里幽峻清奇江
南稱最郡邑皆以是山得名

舊浙江通志天台映雲華頂窺溟地踰稽嶺山接海

濱天姥石梁最為險絕

天台縣志環山帶水處中而邑橫山亘其東瀑布峙其西玉笥展誥拱其南赤城五峯奠其北壯麗環富東南勝壤

仙居縣

舊浙江通志大溪環前青圭聳後陽澹九隆迴拱壁立盤谷旋繞於西北天鼻巉巖於東南

仙居縣志仙圍萬山中壁峭巖巉奇拔稱最

寧海縣

儲國秀寧海縣賦山則東有帽尖蓋蒼之絕巘西有
桑洲桐巖之卓峯健城矗立於南鄙天門昂峙於
北封三十六雷當其肘一十六窟蟠其胸其海則
停納萬流宗長四瀆控直港於稽鄞引大洋於溫
福合鎮都而為五十二隸海輿者有三十六

任大治新嶺記寧海泣居白嶠盤山環谷蜿蜒三百
里結嶺最多其尤者東有西溪西有桐巖北有柵

墟南有寧和黃公古渡皆巍峩峻絕而摘星最著
峻壁倚天層峯聳疊飛泉瀑布相夾而盤桓者十
有餘里為縣南保障

弘治寧海縣志大溪前橫天女後峙尾間洩東海之
水健跳固南疆之守

寧海縣志崇山侵漢巨海驚濤四面圍繞巍然為赤
城東鄙縣當山脊其地穹窿山形環抱蓋蒼桐柏
鎮乎東西道山間風峙乎南北是為四極

太平縣

赤城新志太平割溫樂清之下山越嶠嶺跨大江以
為界

舊浙江通志東有盤馬石蒼之險南有嶠山樓旂之
固盤山方巖橫於西靈湫丹崖倚其北

金華府

金華縣

附郭

葉適寶婺觀記金華山高千仞旁走三縣漫隴伏岡

卷二十二
錦出繡沒四顧百里不蕩不迫有臨望之美無遊
觀之病浙以東稱最焉

宋濂越國公祠記婺為海右大藩連甌引越

王一寧送張宗原赴金華序金華浙東要郡溫處之
衝八咏之樓雙溪之水勝甲天下

趙志皋金華縣學記二水襟環萬峯屏峙巋然距於
東南郡邑辰山而治

王治國星君樓碑記金華固上游地長山北擁蒼麓

南賓控三山而引兩浙襟甌枯而帶嚴衢

舊浙江通志諸山蜿蜒勢如遊龍迴巒列嶽左右分
支如連屏而列戟乃拱衛乎四維

蘭谿縣

舊浙江通志南出閩廣北距吳會後枕仙華之險前
挹九峯之勝大溪合流滙於其下

蘭谿縣志銅山蟠其左蘭陰踞其右桃塢列其前石
屏擁其後四境則自東而北皆壽昌建德之山障

塞而周回南面九峯列戟橫亘加以衢婺兩溪之水數百里奔流會合為澌之文有蘭之馨秀氣鍾焉

東陽縣

許謙送胡古愚序東南隅山水佳處蜿蜒磅礴綿延數十百里峙為雙峴經野建邑於是焉依

舊浙江通志二盤高聳崑山雄踞碧峴南排紫鬼東峙白鹿與青臺競秀夏山與東白爭奇

義烏縣

陳炳義烏儒學記繡川婺之著邑山竄而邃泉疏而清

黃潛淨居寺記重岡沓嶺周如四墉

王英義烏儒學記山有金盆紫微之高水有雙溪秀川之流以為一郡之鎮

義烏縣志負山而治塹設天險層岡盤錯匯以繡川環以長江吞吐包絡勢若建瓴右跨航溪左負魏

麓前則文峯玉几而楓坑鐵巖奠於坤巽之維後
則蓮巖錦屏而龍祈五雲應於乾艮之位

永康縣

舊浙江通志靈山石城之勝映帶左右之間

永康縣志據崇山而五峯峙其北襟青流而雙溪會
其南縣治特立其中實四面山水之會

武義縣

熊秋芳武義縣志序西南接溫處東北達杭嚴山谷

盤結勢嶙峋起因巖邑也

劉養中熱橋記婺據浙上游控制括蒼以西姑蔑以東其最當孔道莫如武川首於永趾於金於蘭與三邑相錯谿山道理相綴屬間道走溫處下達嚴灘錢塘其要津則熱溪

舊浙江通志負壺山帶熱溪白陽環左書臺倚右

浦江縣

水經注浦江右濱長江左旁連山平林修通澄湖遠

鏡

宋濂東明山精舍記倚山為縣自仙華峯斜迤而東
若萬馬長趨不復迴顧二三十里之間滿望皆山
鄭崇太平橋記浦汭東合澄溪入諸暨陸出烏傷道
經澄溪之上為東州都會之要津

張應槐仙華八景圖序浦在萬萃之中為巨浸之首
縣治前障後屏錦圍繡錯壯麗嚴整甲於他邑

湯溪縣

舊浙江通志山環而曲水潯而深九峯蜿蜒蟠據乎
西南激江曲折環迴於東北

衢州府

西安縣 附郭

李華衢州刺史廳壁記名山大川既麗且清

毛扞舟亭記衢為川陸之會南走閩西適楚距浙
江五百里而近

程俱保安院記信安地接荆閩風氣相薄其山遽以

峻其水清以駛

成化衢州府志衢為浙上游居廣川大谷之間南際
甌閩北抵歙睦諸縣之水會於城下達於浙江以
入於海而峻山疊嶠呈奇獻秀拱抱迴合形勢之
勝甲於旁郡

劉麟長試士館記起突兀於南關障百川而北迴下
瞰吳越坐我腋跨

賀康載西安縣學記西南諸峯聳秀東西雙流環抱

蓋形勝之區也

舊浙江通志南際甌閩北抵歙睦崢嶸挾鎮九隆鎖
江周回平曠山環水繞

西安縣志西安疆索東西迫隘南北遙阻故南鄙為
重而北次之南山峭矗萬重鳥道一綫徑術雜出
須江遂昌皆奧窔無人之境其東南入枯蒼為黃
檀羅樟諸源險僻尤甚

龍游縣

秦鳴雷龍游縣學記南峙照臺西維澱川變幻千態
舊浙江通志西通百越東達兩京秀發九蓮奇開三
疊上接澱水之流下扼嚴灘之要

常山縣

舊浙江通志山谷綿密溪澗縈迴南臨禹蹟北起三
衢文筆卓立於左西高聳拔於右

常山縣志常實江浙交界之地巒嶺逼處形勢峻絕
以浙拒江者封草莽之關則萬騎可遏以江拒浙

者塞漁溪之津則一艘莫通昔人謂為雄鎮不其然哉

江山縣

毛愷江山縣石城記江邑左溪右山僻在山谷中南達閩西抵信東走括蒼其途蓋旁達焉

蔣德璟江山縣志序江山越之東南偏其山錦文其泉須女其交閩楚其隸太末浙之上游

舊浙江通志高峯深谷峻絕修阻為閩浙之要衝作

三衢之屏障

江山縣志地據上游有高屋建瓴之勢操七閩之關
鍵輦兩浙之藩籬

開化縣

胡儼歷科題名碑記衢之上游山秀而卓水清而駛
開化縣志縣居郡西北據浙江上游與嚴徽饒信接
界金錢左聳臥佛右偃鳳凰翔其前鍾山峙其後
嚴州府

建德縣 附郭

余植建德縣題名記面受二江背負一龍六邑冠冕
余植進士登科題名記千峯聳翠雙湍瀉玉

周望建德縣學記原隰平衍川湖襟帶壯麗之觀

舊浙江通志面受重江背負峻嶺高峯聳秀於其東
建蒼環繞於其西

建德縣志北枕龍山南襟丁水東眺雙臺雲烟聳翠
西連疊嶂漸歛分流

淳安縣

王遂清溪橋記邑之山溪宏麗清泚蓋上受歙流下
過錢塘而注之海南達婺衢饒信遠及甌閩無不
於此焉出

方回峽石賦歷故鄣之遺區溯桐江而西上百灘跳
以湍駛萬峯間其清明維還淳之古邑割歙封之
東壤

商輅淳安縣學尊經閣記峯巒環拱如屏如障

徐楚蜀阜十景賦羣峯龍驤而北注衆壑馬突而南
來東山埒秦岱之雄三峽比瞿塘之險

舊浙江通志東連建德西接新安青溪環其前蛟峯
鎮其後吳越封疆從茲交會

桐廬縣

吳均與朱元思書奇山異水天下獨絕

皇甫師中桐廬縣城門記睦州之境桐廬最居其要
雙溪合流而泛於江陸之所至西達閩廣北連吳

越舟車旁午左右輻輳井閭繡錯古號佳邑

新定續志桐廬溪山秀妙陸魯望所號為清涼國

舊浙江通志桐君拱揖牛山突起襟大江而趨吳會
帶兩浙而赴錢塘

桐廬縣志桐地襟山帶河控吳越之上游作徽寧之
外蔽江右閩廣往返必經綏一隅以絡四方實稱
扼要之區

遂安縣

水經注浙江又左合絕溪溪水出始新縣西北逕縣
故城南為東西長溪溪有四十七瀨迅流驚急奔
波聒天

舊浙江通志南呈織宿西拱石英婺峯當牛女之墟
義山據武強之勢

壽昌縣

方道叡壽昌縣學記邑治負山面溪山川高深風氣
完厚

貝瓊翠屏軒記壽昌羣山旁圍一水中亘而東北一
山却立千仞者曰屏風

嚴州府志嚴山鎮其背丈溪環其膺羣峯迴合如城
郭狀

壽昌縣志據嚴陵之上游扼甌欽之要險

分水縣

胡宗憲外巽二峯建塔記嚴以烏龍為鎮峻嶒雄峙
盤踞百餘里折而東雙峯矗起是為外方其馬目

山蜿蜒自西南來昂伏攢蹙駐於南是為巽方徽
發二水紆徐縈迴繞卯巽而東之卯於先天卦位
為離離與相薄二塔並聳則形勢全而靈光煥其
文明之象乎

溫州府

永嘉縣 附郭

丘遲永嘉郡教授控山帶海利兼水陸東南之沃壤一
都之巨會

王十朋壽聖白巖院記震旦東南名山雁蕩白巖仙
溪峯聳而奇水清而駛

王十朋綠畫軒記峯巒奇偉林麓靜深環合映帶藍
黛之色與天連碧

方輿勝覽郡當甌越之衝負山海之監環地千里
元史地理志東界鉅海西際重山

黃潛海堤記俯瞰大海江出郡城之後東與海合

王瓚溫州府志序溫在浙東極處枕江界溟天設奇

勝危峯層巒環拱四境蟠幽宅阻一巨都會

鄧淮溫州府志序浙十有一郡而溫獨遠枕閩福控
台括實東南沃壤依山為城環海為池

溫州府志山川秀麗甲於震中二雁爭雄九斗交映
舊浙江通志楠溪太平險要扼絕江繞郡城東與海
會斗山錯立寇不能入

溫州府志左連海岸右接括山閩浙二水作其襟帶
台明兩州為其堂奧蓋瀕海之國此亦一保障云

樂清縣

侯一元城鶚頭碑記後所犄角內地斯固其外海壩
要害之處列障戍兵

舊浙江通志樂清前臨巨海後擁羣山九斗文峯蟠
其左蕭臺西岑居其右

樂清縣志小山中峙正當海口名曰印嶼為邑之案
自南而東列置烽堠以控制盤石蒲岐防遏海道
其山川宏麗蓋他邑鮮儷焉

平陽縣

嘉靖浙江通志雙鳳前分蛾眉後列江貫橫陽地連

雁蕩

平陽縣志平邑東南濱海西北抵山兩浙咽喉八閩

唇齒

瑞安縣

林字濟涉亭記瑞邑城臨江潯南達平陽西抵泰順

遠連閩越

舊浙江通志左繞文峯後環棲隱

瑞安縣志大海巨浸界其東大羅雲峯諸山亘其北
雲江襟其南西南則閩括萬山之支膝

泰順縣

葉適泰順縣城垣記泰順為甌之西鄙接壤閩括重
山迴谷實為深僻之地

萬厯溫州府志泰順為邑東有龍鬬大川西抵福安
高山飛龍山峙其南舞鳳山倚於縣治之北山川

秀麗林木深阻

舊浙江通志飛龍南繞舞鳳北環
枯閩交壤形勝天設

處州府

麗水縣

附郭

陶弘景對謝中書啓高峯入雲清流見底兩岸石壁
五色交輝青林翠竹四時具備

元和郡縣志湍流險阻九十里間三十六灘

方輿勝覽連浙郡控閩山

括蒼景紀東飲甌江西挽閩嶠大溪繞其南層峯鎮其北東南之名區也

括蒼景紀麗水東北以桃花隘稽勾嶺為門戶以圳頭石塘為襟喉

崇禎處州府志處州在浙南鄙接壤閩建北界台婺東引甌越西交三衢萬山中一都會也

青田縣

方輿勝覽羣山倚天湍流據險

劉基湖山義塾記青田之山有泉匯而為潭入谷是
為高湖之源其上有奇峯絕巘大小盤迴獻奇納
秀

崇禎處州府志青田東南接壤永嘉水陸所會實山
海襟帶之區

舊浙江通志左盤括蒼右據永嘉前臨大川後負崇
岡南田環匝地勢平曠

青田縣志羅山為城塹江為池百盤棧石險鑿天梯
七十飛灘直奔斗口右接括州為材木薪芻之外
府左連蜃海實魚鹽粟米之中庖

縉雲縣

崇禎處州府志羣峯倚天所在阨塞蒼嶺桃花之隘
有一夫當關之勢茭嶺黃龍屯集防禦亦磐石之
固也

縉雲縣志蒼嶺峙其東茭嶺阻其西桃花隘其南黃

龍控其北

松陽縣

嘉靖浙江通志 馬鞍青蒙列乎其東雲巖翠屏峙乎其西

崇禎處州府志 松陽郡西上游西北以赤溪龍虎坳為肩鑰而竹峪為尤要東南以寨頭大陰口為藩籬而南嶺為最高

松陽縣志 龍脈逢源擁馬峯而立極鰲輿列蔓憑牛

嶺以為宗趨東則萬脈分流以入於海踰西則千溪共匯以入於江

遂昌縣

湯顯祖遂昌縣土城碑記遂昌治萬山谿壑中介長松龍泉猶毘境也西北而南走衢嚴婺鄣犬牙信州以達於閩綿迤奧絕

崇禎處州府志遂昌郡西北巖邑北抵龍游西南通龍泉而以新嶺貴義為襟喉西北接西安西距江

山而以龍鼻頭周公嶺為鎖鑰北設礮口寨以橫
遏閩浦之衝

處州府志環邑山倍於水左有土鼓之異右有文筆
之奇瑞山屹其前兌谷擁其後白馬蜿蜒飛鶴迴
翔兩溪夾流一水東會括西名區也

遂昌縣志襟帶龍泉聯續麗水景寧星峯錯落於前
松陽喬阜環翠於後紆徐秀特隱然形勝之美

龍泉縣

宋濂看松菴記龍泉多大山其西南百餘里諸山為尤深

崇禎處州府志龍泉當浙閩之交層巒疊嶂雙溪橫貫鳳凰翱翔石馬騰踏北山舒翼抱於左桃源回首拱於右直前則修橋傑閣擁後則九姑靈蹤地勢夷曠他邑莫及

龍泉縣志縈迴盤錯於東者武溪吳嶺屹立雄峙於西者匡山玉山北則鶴嶺玉峯以擁以蔽南則湖

臺安瀕乃障乃屏

雲和縣

崇禎處州府志雲和萬山環峙四塞之封可稱地險
舊浙江通志雲和羣山翕聚二水交流聯續麗水襟
帶龍泉路僻溪迴攝乎閩越

雲和縣志大金坑通慶景二處巖崖深峻鳥道崎嶇
要害之地

慶元縣

富嘉謨慶元縣建縣始事記巉巖之峯谿衍之石屹
立於甌南閩越之交嶺復而益峻道隘而逾險

陳垣慶元縣築城記樓堞門鍵延袤相屬如鐵甕如
金斗煌煌哉百里之壯觀也

何鏜慶元縣學記龜石砥於中流龍潭匯於西北誠
風雨之交陰陽之會

崇禎處州府志慶元距郡最遠介在閩越若橫嶺巒
頭溫陽烏石九蟠足稱四塞其水夾障而下分注

激射竹口為三面藩蔽

慶元縣志南拱霞帔北依象山溫陽聳其左石龍蟠
其右仙桃列於東南薰錦峙乎西北石壁馬蹄為
門戶棘蘭喜鵲為咽喉

宣平縣

崇禎處州府志宣平四山環匝二水合流南有瀑布
之奇西有楓樣之秀若寨頭大高北足以拒武湯
九盤竹溪西足以蔽松遂小妃渠溪洗灘槁嶺無

不可隨地扼控

王深源通濟渡記驚湍洪流衝激怪石險與三峽等
王墳何村三元橋記宣慈原野之沃溪山之勝北抵
金華南通甌海沿浚源於樊岡春湍夏潦衝激悍
駛

景寧縣

崇禎處州府志景寧四山環繞前挹溪流南有石佛
蜂桶隘東有綠銅龍首關可遏泰順青田之衝截

壽景雙港之患

舊浙江通志景寧北枕桂山南連勅木登高望遠氣
勢蟠鬱

景寧縣志湍流阻險羣峯插天青田上潯甌閩門戶
玉環

海防類考續編玉環山與蒲岐相對懸居海中聯絡
深長楚門霓臺必經乎此最為險要

玉環志外臨大海內近溫台海疆諸郡之屏障洋面

往來之要區

謹按玉環山雄峙海面外截東洋內資保障所在
崇岡峻嶺周匝環列西達烏洋東逼黃花西北楚
門霓壘截業拱衛出此則為黃坎二門實為溫台
門戶東海咽喉有山可以瞭遠番舶之往來畢照
有口可以巡查洋匪之伏匿潛消浙東防禦此為
要津其展復始末剏制事宜俱詳建置城池海防
兵制諸
志中

浙江通志卷二十二

欽定四庫全書

史部

浙江通志卷二十三

詳校官給事中臣戴璐

檢討臣德生覆勘

總校官編修臣倉聖脉

校對官學正臣湯垣

謄錄監生臣陸鼎

欽定四庫全書

浙江通志卷二十三

城池上

兩浙為東南大藩名城數十因山塹谷屹然稱金湯焉

聖朝德化翔洽海宇乂安而掌固所守猶勤版幹其在
記曰孟秋之月補城郭言役有時也左氏傳曰計
丈數揣高卑度厚薄仞溝洫言工有度也其所以

保障斯民之意至深切矣志城池

杭州府

杭州府城池

錢塘仁和
二縣附郭

元豐九域志隋楊素創周

回三十六里九十步資治通鑑唐昭宗景福二年

錢鏐發民夫二十萬及十三都軍士築羅城周七

十里

詳見
古蹟

咸淳臨安志紹興二十八年增築城東

南之外城

謹按宋史紹興三十
一年五月增築禁城

城東便門候潮門

保安門

舊名小
堰門

新門崇新門

俗呼薦
橋門

東青門

俗呼
菜市

門

艮山門城西錢湖門清波門

俗呼
暗門

豐豫門

舊名
湧金

門

城南嘉會門城北餘杭門水門保安門南水門

北水門天宗門餘杭門成化杭州府志元既取宋

禁天下修城以示一統而內外城日為居民所平

至正十六年張氏陷姑蘇據浙西五郡十九年發

松江嘉興湖州杭州民夫復築焉自艮山門至螺

蛸門以東視舊則拓開三里而絡市河於內自候

潮門以西則縮入二里而截鳳山於外門仍一十

有三東無便門保安二門北增天宗北新二門南

嘉會門改曰和寧門

貢師泰杭州新城碑至正十八年春平章謁太尉曰錢塘

東南重鎮地當衝要城郭不完其何以守太尉曰然茲實大役汝其白之丞相丞相謂天方旱民將勿堪議久未決則又曰丞相無憂也當有以處之遂詣太尉請出粟二十萬石以始興築命郡守謝節考觀圖志以諸故實地植表以正方位視民力上下田賦多寡授之丈尺以均其徭發姑蘇吳興嘉興松江四郡及一州兩縣四隅之民更相作息以亟其成猶慮夫趨事之或怠也則督部將先築錢塘並湖者數百丈為之程勸且誓羣有司曰凡今之為非徒勞民且費也勞之將以休其力費之將以衛其財諸君其勉喻之吾且日視其勤惰矣其自候潮門步至東青門則平江守周仁治之自

錢塘門步至豐豫門則吳興通守陸大本判官張士俊治之餘杭則嘉興通守繆思恭治之艮山北新清波則松江通守謝禮推官馬玉麟治之和寧與錢湖則屬之海寧州仁和縣而總其役者實謝節也令下之日風馳電驅小大奔走莫敢不共伐石於山浮木於江舟輪輦載千里相屬荷鍤揮杵萬堵皆興不三月而功已告成凡用石之工一百六十二萬木之工一十五萬圻之工一百八萬金之工二萬徒一千三百五十萬土石碑甃灰鐵木植麻枲之數累鉅萬億而不可勝紀也城之周六萬四千二十尺高三十尺厚視高加十尺甃以貞麗錮以堅珉礦墜堊塗雪立虹貫舊城包山距河故南北長今則截鳳山於外絡市河於內故東西廣而廣輪適中焉為門一十有三東曰候潮曰新門曰崇新曰東青曰艮山西曰錢湖曰清波曰豐豫曰錢塘南曰和寧北曰餘杭曰天宗曰北新上

各建飛樓四楹而外為甕城門皆左右闢其餘艮山清波各為月城環旋出入互相屏蔽鑿石為樞冶鐵為扇金鋪銅環啟閉有則縣以飛梁塹以重壕內凡二百步設磴道以上下人馬外凡百餘步炭方臺以便矢石其上則發號之亭邏卒之舍睥睨樓櫓連輓飛礮靡不畢具於是崇墉堅壁若天造地設而形勢為之一新矣經始於十九年七月十三日迄功於是年十月某日

萬歷杭

州府志至正二十六年十一月明太祖命曹國公朱文忠兵取杭州守將潘原明以全城內附遂因

之為省城門省為十東城五門曰候潮曰永昌

舊名

新門俗呼

曰清泰

舊名崇新門俗呼薦橋門今呼螺螄門

曰慶春

舊名

草橋門

東青門俗呼菜市門今人呼太平門

曰艮山

俗呼壩子門

城西三門曰清

波曰湧金

舊名豐豫門

曰錢塘

舊又有錢湖門今塞按錢湖門舊址在鐵冶

嶺下介清波鳳山之間今此地居民猶仍舊名

南城一門曰鳳山

俗呼正陽門

北城一門曰武林

舊名餘杭門俗呼北關門舊又有一天宗門俗呼小北門今塞

為水門四在鳳山候潮艮山武林各門之傍城門

樓一十有九

湧金門無月城樓止一

水門樓二

武林艮山

雉堞九

千八百三十三垛將臺五十座警鋪一百七十一

所制多仍舊成化十一年左布政使甯良議於錢

塘門左湧金門右開九渠之一為河以導湖水鎮
守太監李義上其事從之於是開為水門闊七尺
高九尺入深四丈九尺嘉靖三十三年巡撫都御
史李天寵清負城馬路之侵沒者自鳳山門迤西
北至清波門闊凡三丈餘長不可計三十四年二
月倭將犯杭州提學副使阮鶚增築錢塘門月城
雉堞高二尺湧金錢塘二門相去數里中舊有磴
道以便守城者上下隆慶五年十月督撫都御史

鄔璉令於城之西上築嚴警樓一座分營兵直宿
萬歷二年二月督撫都御史謝鵬舉令所司毀磴
道萬歷錢塘縣志慶春門有水門萬歷二十二年
督撫常居敬郡丞涂文奎開三十一年督撫尹應
元右布政范淦議大修城凡二年竣役城壕南邇
浙江西即以湖水為險其東起永昌壩並清泰至
慶春門止中廣二十餘丈長一千丈九尺自慶春
歷艮山廣三十餘丈迤北至武林錢塘門止長二

千六百二十三丈二尺嘉靖三十五年武林錢塘
二門外各浚壕甃閘上構弔橋環城皆有深池是
年霖雨湖水泛溢錢塘門北城衝圯三十餘丈乃
塞壕併毀橋閘杭州府志明季巡撫董象恒用形
家言塞十城穴十分之二

國朝順治十五年總督李率泰併女牆二垛為一康熙
初改永昌門曰望江門二十四年巡撫趙士麟委
府倅靳襄宋德深等修築雍正五年二月初九日

欽奉

上諭

恭紀
首卷

修理城垣巡撫

臣

李衛會同將軍觀風整俗

使將杭嘉湖等府城垣確勘興修杭州府仁和縣
所轄湧金錢塘武林艮山慶春等五門并艮山門
水柵錢塘門官廳錢塘縣所轄清波鳳山候潮望
江清泰等五門并十門營房俱修葺完竣

海寧縣城池 咸淳臨安志鹽官縣舊城在縣西北
四十一里周六百步高八尺隋大業十三年築今

城周四百六十步高二丈唐永徽六年築壕闊五丈深四尺萬厯杭州府志舊城入元圯至正十九年築高一丈五尺周回七里九十步

貢師泰城海寧州詩序海

寧故鹽官縣入國朝以戶衆陞為州其後又以潮決南崖州將盡入於海民吏驚懼捍以數郡之力而決猶不止朝廷遣使投壁沉馬而祝祭之幸得寧遂改令名大抵境內地下淖沮如高者又皆沙土故城址漫無存者至正十九年江浙分省檄左右司都事陳君元龍相其地勢而興築焉君至則下令聽民自定其力之上下以均其徭有不實輒治之并以坐吏於是奸豪懾服貧懦感德小大相勸萬手並作不數月而堅壁高壘屹然為東南保障矣

明洪武二十年信國

公湯和增築高五尺永樂十五年十一月都指揮
谷祥增築雉堞三尺計高二丈五尺下廣二丈五
尺上廣一丈八尺造月城城門樓十警鋪四十九
所雉堞一千三百七十五垛為門五東曰春熙西
曰安戌謹按成化
志作安肅南曰鎮海北曰拱辰東北曰宣
德水門三一在拱辰門西一在宣德門北一在安
戌門南三門外各有弔橋壕闊五丈深一丈海寧
縣志嘉靖三十四年邑令蔡完以倭警後加高城

磚五尺增添女牆及巡警鋪四十五所敵臺二十四座又浚城河加深五尺共深一丈五尺

國朝順治十一年邑令秦嘉系繕城濬壕修拱辰門雍正五年欽奉

上諭檄知縣胡景修築完竣雉堞整固樓櫓一新

富陽縣城池 咸淳臨安志周回六百步高一丈壕闊一丈五尺舊傳咸通十年縣令趙訥修築成化杭州府志元至正十六年江浙行省叅知政事楊

旺扎勒重築周回三里元末毀萬歷杭州府志明嘉
靖二十五年知縣桂軌築城於古城東南廣六里
延袤一千丈有奇厚二尋內外俱甃以石城門樓
四雉堞一千二百堵為門四東曰昇平南曰萃和
西曰康阜北曰達順隆慶五年分守叅政李淑於
儒學前城關門曰文明壕東南以長江為險富陽
縣志縣城東跨觀山西臨苕浦南俯大江北帶後

河

國朝康熙十年知縣牛奐修二十年知縣錢晉錫重修
雍正七年總督臣李衛委知縣朱永齡開濬城內
并北門外一帶河道

餘杭縣城池 咸淳臨安志舊縣城在溪南周回六
里二百步東漢熹平二年縣令陳渾徙於溪北後
復治於溪西後唐時號為清平軍城錢武肅王又
修廣之雍熙初再徙溪北周五百四十三丈高一
丈三尺下廣一丈五尺壕闊二丈五尺舊城門四

曰榮春湖光迎波永豐成化杭州府志舊城入元
圯至正十六年江浙行省叅知政事楊旺扎勒仍於
溪南築周回三里內附後毀萬厯杭州府志嘉靖
三十五年知縣吳應徵重築自西迤北至東五百
丈高一丈八尺自東迤南至西二百三十丈高三
丈二尺周廣一丈六尺城門樓四雉堞一千三百
四十三堵為門四南曰對薰北曰拱極東曰賓陽
西曰秩成壕無南臨苕溪餘杭縣志臨溪南城有

水門二萬歷三十二年知縣程汝繼增築月城曰
啟秀四十二年東南城圯知縣戴日強重築日久
復圯

國朝康熙十年知縣張思齊增築城垛二十二年知縣
龔嶸增修雍正六年知縣何儻重修

臨安縣城池 咸淳臨安志周回五百二十步萬歷
杭州府志舊有城依太廟山周五千五百六十步
池在東北錢鏐時名衣錦城為門四東迎恩西惠

政南望錦北拱辰後玳杭州府志洪武初遷縣治
於今所嘉靖五年縣令廖瑜仍立四門東會錦西
聚金南迎薰北拱極各樹木柵三十四年縣令魏
希古設土垣以資防禦周五里高一丈

土垣內外
俱民產各

隨業修葺
歲以為常壕環如城

於潛縣城池 咸淳臨安志古城在縣北二百四十
步耆老相傳隋開皇十三年越國公楊素築令城
周四百五十二步高一丈五尺厚五尺基厚一丈

八尺壕闊一丈八尺深四尺成化杭州府志元至
正十七年江浙行省叅知政事楊旺扎勒重築自金
鷺峯而西由石龍口直抵縣後山周五里高一丈
五尺厚一丈壕闊一丈為門三西曰錦江南曰迎
恩北曰仰山其東則以山勢逼阻不置門

新城縣城池 咸淳臨安志縣因山為城周二千五
百七十一步高二丈二尺唐大順二年杜稜築有
門四東曰熙春南曰太平西曰順成北曰寧海成

化杭州府志城今圯壕與遺址僅存萬歷杭州府志嘉靖三十四年知縣范永齡築城周三里計六百餘丈高一丈六尺厚倍之城門樓四雉堞五百七十堵為門四東曰元始南曰亨通西曰利遂北曰貞成方廉為記新城縣志吳越時杜稜築城鑿隍引堰水注之堰去城八里往往不得達明天順六年郡守鉛山胡濬至邑相度築塢山堰開溪導流以入壕凡壕內地鑿渠引水接通城河凡五里許

國朝康熙十一年壕淤漸平知縣張瓚重濬雍正五年

欽奉

上諭檄知縣羅燴增修

昌化縣城池 咸淳臨安志周三百六十步壕闊一

丈五尺久廢惟古木環城基成化杭州府志舊城

周回三百六十步厚一丈五尺壕闊一丈五尺為

門三東曰趨京西曰三瑞南曰登龍其北則以負

山不設門元至正十七年江浙行省叅知政事楊

旺扎勒重築自登龍門而東轉唐山西南至溪澣凡
七里餘高一丈五尺厚一丈八尺門三仍舊名萬
厯杭州府志明隆慶三年七月知縣周易請於巡撫都
御史谷中虛創東西二關杭州府志萬厯二十年縣令周
洛都於關內充拓舊規各建城樓三加以睥睨女牆臨溪屹立
嘉興府

嘉興府城池

嘉興秀水
二縣附郭

嘉興府志不知所自始嘉

禾記謂唐乾寧中守臣曹信築吳越備史謂唐僖

宗文德元年吳越武肅王命制置阮結築五代晉
天福四年吳越王元瓘拓為州城宋謂之軍城元
謂之路城至元嘉禾志按圖經云羅城周一十二
里高二丈二尺厚一丈五尺子城周二里十步高
一丈二尺厚一丈二尺宋宣和間知州宋昭年更
築德祐元年守臣余安裕重修諮議劉漢傑董其
役增築堡障元至元十三年羅城平子城見存羅
城元有門東門舊曰青龍後改春波西門舊曰永

安後改通越南門舊曰廣濟後改澄海北門舊曰望京後改望雲續改望吳又分為水門門各有樓

嘉興府志補東春波以其路接雙溪之水西通越以其路通越王臺南滄海以其路通海之大洋北望吳以其路通姑蘇臺嘉興府圖記至正十六年路推方叡

同知繆思恭復營城未就明知府呂文燧謝節始竟其役東舊三里高倍於舊二尺面闊一丈女牆三千四百一十五月城四弔橋四城樓四城壕南引駕鵞湖水西引漕渠並周羅城會於望吳門外

北麗橋西北深一丈二尺闊二十二丈萬曆秀水
縣志嘉靖三十四年倭寇郡城知府劉慤亟築四
水門增埤繕隍事寧郡守侯東萊奉檄增高一丈
二尺幫岸三尺改東門曰澄霽西門曰阜成北門
曰拱辰南門曰迎薰萬曆七年城圯知縣朱來遠
修二十年李培加修子牆增高三尺秀水縣志四
十四年知府莊祖誨倡築箭樓窩鋪馬坡兩縣分
治嘉興縣轄城垣一千一百七十二丈八寸秀水

縣轄城七百八十丈七尺二寸凡八閱月而工竣
天啟二年知縣湯齊修築城堤及堵

國朝順治二年東城樓燬嘉興縣知縣張厥修重建十

五年增高城垛併二為一康熙四年南水門圯嘉

興縣知縣林達重築康熙四十九年築水關於西

城

俗呼小西水門

雍正五年巡撫

臣

李衛欽奉

上諭會議察勘興修遴委原任衢州府知府靳樹德協
同嘉興府知府閔堯熙督令嘉興秀水二縣併力

修葺重建門樓四座每座增加一層各題其額東曰樓觀滄海南曰澄湖凝秀西曰浙西鎖鑰北曰咫尺雲天又於澄海門之東清波門之西創建魁星閣一座睥睨堅整闔閭一新

嘉善縣城池

嘉善縣志舊無城嘉靖三十二年倭

寇內侵巡撫王忬因知府劉慤議奏請築城命本府通判鄧遷董其事甲寅冬十月四日興工次年三月四日竣事水門五

其南一門今塞

陸門四東曰大勝

西曰太平南曰慶豐北曰熙寧各因其坊舊名也
周一千四百八十八丈高二丈三尺五寸厚二丈
二尺計六里三百七十步凡二千六百六十四垛
箭臺二十六座望樓四座旁臺五座窩鋪三十六

間

崇禎二年知縣蔡鵬霄拆去十六間存二十間

壕周於城闊六丈

萬曆嘉善

縣志城外東有賓陽門在石灰坊演武場右離城二里西有平成門在跨塘橋北距城二里俱正德五年知縣胡潔建萬曆二十一年知縣章士雅重修舊無城故建二門以備啟閉今則隱然有重闕之意
云 舊浙江通志萬曆二十年知縣章士雅修崇

禎十年知縣李陳玉更修

國朝順治十五年知縣方舟增高併堵康熙二十五年
知縣嚴弘祖重建西門城樓二十八年知縣李之
藻重建東門城樓四十三年知縣于舜枚重築東
水門五十三年知縣梁文燧重建南水門五十八
年知縣孫錦重修西水門城內河渠為居民淤塞
康熙二十三年知縣崔維華開濬城河雍正五年
欽奉

上諭檄知縣邵煜增修

海鹽縣城池

海鹽縣圖經城在吳禦越城西北周

六里三十五步高二丈五尺池周一千三百四十

丈深一丈二尺廣六丈九尺陸門四曰靖海曰望

吳曰來薰曰鎮朔水門南西北三跨壕門各有橋

明洪武十七年設海寧衛於城是年浙江都指揮

使司以信國公命檄寧波衛指揮許能加築永樂

十六年都指揮谷祥復葺之嘉靖三十二年都指

揮張鈇有外墉之築明年知縣鄭茂增築子城四
並城敵臺十有八其制可三面瞰外施礮石歲久

城圯萬厯二十一年知縣王臨亨重築

王紹登重修海鹽縣

城記千雉有翼守國之規遠百堵聿興廬始之謀
大雅此鹽官聿稱畿邑輔橋李而作鎮枕滄溟以
莫城素車白馬之濤響鼓鼙人鯨客之羣趾
錯塵市所繁烽燧時驚刁斗不輟王大夫心虞復
隍謀先版築鳩工庀材負鍤先衆系城千三百丈
女牆增高者三尺始於二月朔竣於三月之晦計
費餘二千金言言若金登陴易守蕩蕩如漆拔幟
難上栖霞丹樓馬事長康之喻凌雲碧雉奚煩明
遠之嘆委命紀
成式形不朽 舊浙江通志天啟二年知縣樊維

城修

國朝順治十五年增高併堵雍正五年欽奉

上諭檄知縣王仕正重修

澉浦城

舊浙江通志在縣西南明洪武十九年安慶侯榮陽侯委海寧衛千戶費進築周八

里一十七步高二丈四尺五寸永樂中谷祥以磚石包砌正統八年侍郎焦鉉參政俞士悅勸議備料重修嘉靖三十五年知縣鄭茂增敵臺一十六座陸門四西水門一池周九里三步闊五丈深一丈一尺

國朝康熙五十七年知縣梁澤奉檄重修

石門縣城池

弘治嘉興府志自元末張士誠據蘇

州於本縣築城周五里三十步置城門四水門三
洪武十九年海寧衛奉左軍都督府勘合將磚石
拆運公用舊址尚存池在舊城址外闊七丈深二
丈二尺里步比城有加石門縣志洪武十九年倭
寇海鹽徙城乍浦天順間王令輿立四門為障嘉
靖三十四年倭入寇蔡令本端奉檄度地甃築明
年五月城完凡七里餘三十步高二丈七尺闊一
丈城門水陸各五三十九年劉令宗武再建城樓

四南北甕城各一座添築箭臺三十敵臺三壕周
於城

國朝順治十五年知縣李震奉檄併堞培高康熙五十
一年知縣韓麒趾重修四門城樓雍正五年欽奉
上諭檄知縣呂廷鑄重修

平湖縣城池 平湖縣志縣無城郭嘉靖三十二年
島倭為亂署縣事推官殷廷蘭奉檄築城三十三
年知縣劉存義圖度形勢審定疆理規制稍具三

十五年知縣陳一謙設東北二甕城四十一年知
縣顧廷對增女牆崇雉堞並高五尺置窩鋪百有
十二城寬九里陸門東曰啟元西曰毓秀南曰豫
泰北曰豐亨其西南曰小南門水門西南北各一
東據當湖巨浸為二

張時徹修城記平湖故為當湖鎮海鹽所治也宣德四年

始析壤而邑之民以蠶稼魚鹽為業嘉靖壬子寇
掠黃巖癸丑四月遂掠平湖時郡守劉懋調兵轉
餉推官殷廷蘭署邑事挽舟飛控寇稍稍引却乃
僉議事城請於撫按藩臬諸司次第報可守乃與
殷君揆度土方為水門五陸門五為城樓為窩鋪
為外壕為內馬道為水閘周一千六十九丈有奇

高二大廣如之表裏以石覆以磚凡用官銀三萬二千八百有奇尅日告成而知縣劉存義適來圖所未備罔不畢具工起於九月十二日訖於十二月二十日

國朝順治十八年增高併堵雍正二年知縣林緒光詳請開濬城河東水門久經湮塞因疏東門玉帶河并開水門居民便之雍正五年欽奉

上諭檄知縣楊克慧重修

乍浦城

舊浙江通志縣東南二十七里平湖縣志明洪武十九年信國公湯和居守累土列

亭障永樂十二年都指揮谷祥始用石甃正統八年久雨頽塌勘議令杭湖二府佐嘉興府葺治景

欽定四庫全書

卷二十三

泰二年都指揮使王謙設城樓四櫺楯杆櫓俱備
嘉靖三十三年知縣劉存義增築併建敵樓十以
眺海帆謹烽火市舶出沒皆得指數城寬九里十
有三步高二丈廣一丈五尺陸門四北水門一壕
周一千六百三十丈深八尺闊十丈弔橋四崇禎
十一年署縣事李陳玉申詳院道開設東南水門
一座

國朝雍正五年奉

旨移蒲洲駐防官兵住劄乍浦創建營

房繕城濬壕峻整深固百倍往昔

梁莊寨城

舊浙江通志距乍浦二十七里周一里
高二丈池闊二丈深五尺平湖縣志明

正統五年巡按李奎以海門要衝奏建大寨城周
八百丈高一丈五尺城樓二角樓四置兵守禦嘉
靖四十年知縣顧廷對申請移乍浦巡檢司居之

國朝置梁莊山寨與烽堠臺一并哨探

桐鄉縣城池 桐鄉縣志明宣德五年知府南齊政

相度土宜始分崇邑之東鄙為縣治尚無城天順

初邑令張泰成化中孟俊正德中任洛等俱創築

未完嘉靖三十二年知縣金燕至奉巡撫王忬檄

築成之南門曰時薰東門曰青陽西門曰兌悅北

門曰來遠周一千二百丈外高三丈一尺內高一

丈四尺面闊一丈八尺腳闊二丈二尺上磚下石

水門四城樓四垛口一千一十二月城四臺十二

卷二十三
壕周於城廣六丈深二丈五尺俱通城內四方之
舟楫由之

國朝順治十七年知縣王好仁修城將女牆二堵併一
康熙十四年知縣徐秉元二十三年知縣何金蘭
三十四年知縣郭金湯五十二年知縣魯城節次
增修雍正五年欽奉

上諭檄縣重修

湖州府

湖州府城池

烏程歸安
二縣附郭

隆慶湖州府志府治子城

即古烏程縣治項王故城西吳里語吳興城舊名

紫金城又名極樂城湖州府志按舊志云晉郭璞

欲移郡於東遷璞女亦善地理啟璞毋徙因舊址

損益之可永無殘破之虞璞從之唐武德四年李

孝恭築羅城周二十四里景福二年刺史李師悅

修宋紹興三十一年知州陳之茂重修元至正丁

酉偽平章潘原明以舊城寬而不固乃築小之周一

十三里一百三十八步復建樓櫓於上唐開九門
放生池側有閤門定安門東西各有甕門並廢宋
門六今因之東曰迎春通運河西曰清源通茗溪
南曰定安通餘不溪北曰奉勝俗呼霸王門止有
水門雪水支流所出東北曰臨湖出雪溪通太湖
西北曰迎禧俗呼清塘門止有陸門壕周羅城外
唐武德四年李孝恭築城時所鑿今壕潘原明改
築城時所開也

國朝順治十五年增高併堵雍正五年欽奉

上諭巡撫

臣

李衛委湖州府知府唐紹祖督令烏程歸

安二縣重修

長興縣城池

元和郡縣志吳王闔閭使其弟夫槩

王居此築城狹而長因以為名湖州府志一名夫

槩城又謂之雉城以縣有雉山故也晉隋之間縣

治遷徙不一唐武德七年移縣治於今所輔公祐

輦土而築歲久復圯長興縣志宋天聖中重修城

有七門明元帥耿炳文始築今城比舊減小磚甃甚固高三丈闊二丈八尺五寸周九百二十九丈城門六東曰神武南曰嘉會西南曰承恩西曰長安北曰吉祥東北曰宜春各有甕城水門二東曰清河關通郡城及太湖西曰大雄關通合溪上有門亭沿城浚壕闊七尺深一丈五尺並引箬溪之水分入城歲久圯嘉靖丙辰知縣黃辰修築建樓於六門之上置窩鋪三十

顧應祥重修長興縣城記城始創於吳夫槩厥

形長故邑名長城錢鏐有國避朱梁廟諱改為長興而城之興廢不一頃歲倭寇為亂湖城戒嚴邑民皇皇無以為守前令西原萬君虞龍請於巡撫胡公宗憲事下守巡檄委烏程令張君冕會估修築業已報可而經費未定萬君竟以遷去歲丙辰胡公改總督各路軍馬而以提學憲副阮公鸞為僉都御史代巡撫之任阮公先以提學臨縣校士知吾邑之不可無城也申命令郡守李公敏德速完其事而吾新令黃君辰甫至毅然任之乃量度精密以邑中原設大糧役四十三名各以所轄民戶丁糧分曹並作有不齊者通融裒益務得其平於是人皆悅從匠石雲集經始於嘉靖丁巳春二月至秋八月而工畢周以丈計者一千一百七十有奇高丈有七尺下廣如舊址睥睨高五尺六門因舊為新增城樓者六水闕彫新者二門皆護以鐵葉為窩鋪者四十有二凡費白金為兩二萬六

欽定四庫全書

卷二十三

千八百四十七有奇惟月城之費無所於處以舊址磚石計算縮估城費得二千四百五十五兩有奇不足者鬻城隅餘地補之而月城遂完是役也功雖鉅而民不告勞費有經而下無非議重門擊柝易取諸豫

令君有焉

萬歷三十四年知縣熊明遇因城河

久壅開濬內河延袤三百十六丈加廣五丈加深五尺外河延袤三百六十七丈深廣如內河崇禎二年知縣向鼎修築清河關視舊闊三尺八年知縣吳鍾巒修築大雄關高廣如舊亦加三尺

國朝康熙十年知縣韓應恒開濬城河雍正五年欽奉

上諭檄縣重修

德清縣城池

隆慶湖州府志唐天授間置武源縣

縣治在下蘭山南天寶間改德清徙百寮山南舊
無城郭宋末始築石城明初以修海塘徙用其石
止存土郭縣聯絡溪山因兜汊而為池倚岡邱以
成塹延袤四五里啟七門東曰行春臨溪西曰西
成清商南曰見山廣儲北曰武塘德清縣志嘉靖
二十五年知縣馮煥於要路四門各圍以石上作

望樓易臨溪曰拱乾易廣儲曰峻明易西成曰賓
廛易武塘曰禮辰三十二年倭寇犯浙署縣事推
官方敏建議城之水門五又西水門一陸門五廢
見山清商臨溪而益以迎薰其拱乾易為文昌城
周七百七十三丈五尺高二丈三尺闊二丈塼一
千五百四十有奇敵臺七十月城十丈月城敵臺
三鋪二十五

國朝雍正五年欽奉

上諭檄知縣崔宣重修

武康縣城池

湖州府志漢初平間置在今縣治西

五里之銀山今徙烏回山累土為繚垣舊無城郭

國朝雍正五年欽奉

上諭檄行道府察勘興建

安吉州城池

安吉州志舊治在天目鄉今孝豐縣

址是也唐開元二十六年縣令孔志道移治於王

磬山東南城久未立元至正十六年丙申明兵克

安吉總管張俊德始築土為城丁酉元帥費愚重
甃以石延袤六里高二丈有奇廣半之門四東曰
賓陽西曰寶成南曰麗正北曰拱辰城瀕大溪引
水為壕鑿壕為池僅通舟筏歲久城圯壕亦湮嘉
靖壬子知州林璧重修建城樓更鋪陳良謨
為記甲寅
知州江一麟復加高二尺內土岸以石甃之

國朝雍正五年欽奉

上諭檄知州滕兆彬重修

孝豐縣城池 孝豐縣志明弘治設縣初知府王恂

相有漢縣故城巋然存焉因築土垣周六百一十丈萬歷四年知縣王國賓請更為石城廣六百七十九丈高二丈厚半之城樓四門四窩鋪八水洞三城門東曰威鳳西曰通德南曰靈龍北曰迎安城壕自西跨北廣三丈至迎安門有迎安橋其南溪水環繞至東門為山公潭險塹可守

寧波府

寧波府城池

鄞縣附郭

寶慶四明志羅城周回二千五

百二十七丈計一十八里奉化江自南來限其東

慈谿江自西來限其北西與南皆它山之水環之

唐末刺史黃晟所築成化四明郡志唐末規制未

弘宋元豐元年曾鞏受詔完之寶慶二年守胡榘

因其圯剝重修寶祐間制置使吳潛復拓舊城設

雉堞立巡鋪寘卒以邏越三載畢工又於開慶二

年建望京鄭堰下卸三門其甬水靈橋東度則以

次繕治元初隳天下城池民居侵蝕漸為坦途至
正八年台州方國珍為寇二十年浙東都元帥納
琳哈喇以台密邇慶元復築城以備劉基為之記
後國珍受招安之命據城開江浙分省復加修治
洪武六年指揮馮林更新之崇三之一浚東南及
西三面之壕十四年指揮李芳更增葺之嘉靖寧
波府志府據甬水為城南匯它泉北源姚江合流
桃津峙為崇築高二丈五尺址廣二丈二尺面一

丈五尺周回二千二百一十六丈延袤一十八里
關為六門東曰靈橋東渡南曰長春西曰望京北
曰永豐東北曰和義其四門可通輿馬獨西南為
漕運水路新設重門外設弔橋門各有樓羅以月
城城之上有敵樓四十六雉堞三千五百六十四
警舖六十五外為壕自北至西南環繞通二千一
百四十四丈自和義抵北永豐門通三百四十三
丈濱大江不設嘉靖三十五年守張正和重建甕

門敵臺大加繕修

間淵重修府城記寧波古於越東偏之地秦為鄞邑隸會稽郡

嗣後廢置不一及唐開元中始定為明州城作於
刺史黃晟即今郡城也更五代歷宋代為修葺及
元隳城舊築斯廢方國珍倡亂民閭莫居於是廢
址復城邇來海上荷戈惟憑城固守郡守邱侯玳
甫至上其事巡按侍御胡公宗憲暨諸藩臬司咸
檄命出公帑以資其費遂擇日戒事而以調衢州
去衢守張侯正和來代即身任其役因兼屬甌守
侯若國治董其事又分督以五邑之令夏君儒曹
君太蕭君萬解宋君繼祖毛君德京而張侯則總
其成於上計城周凡二千七百八十七丈修者二
千一百八十二丈造斥堠六十有六敵樓四十有
六馬步階七巡海憲副孫公宏弼王公珣暨張侯
復修築西南二水門羅以月城總費帑銀七千五
百五十兩有奇役民戶之富者四百有奇經始於

乙卯八月迄工於丙辰正月雉
堞煥如萬年保障於是乎在

國朝順治十五年增高併堵歲久漸圯雍正六年總督

管巡撫事

臣

李衛因瀕海重地檄行司道會勘具

摺

奏請興修

大嵩所城

成化四明郡志郡治東九十里鄞縣十
一都地名大嵩洪武二十年信國公湯

和築城鑿池關東南西北四門上各置樓羅以月
城弔橋四穴水門於西門之側周城列窩鋪二十
五永樂十五年都指揮谷祥加修增置敵樓二十

國朝順治十五年增修

慈谿縣城池 嘉靖寧波府志慈谿城後負石刺峰
前面重江左山蜿蜒右山岼聳距郡西五十里高
二丈有奇址廣二丈四尺面胸其十之三延袤十
里關為四門門各有樓東曰鎮海南曰景明西曰
望京北曰環山東西各為小門又穴水門於東西
之左右以通潮汐門各有樓羅以月城雉堞二千
六百十六敵樓二十八警鋪二十七外為壕九里
五分北半里際山無壕洪武初設戍海壩有觀海

龍山二衛所故未有城嘉靖壬子倭掠內地丙辰夏焚掠殆盡始為城邑人葉照馮璋袁煒並為記國朝順治十五年增高併堵

奉化縣城池 嘉靖寧波府志奉化城後據錦屏前依玉几左臨大澤右傍鳳山距郡南八十里高一丈四尺址廣一丈三尺面廣一丈周回一千一十八丈延袤七里闢四門東曰迎恩西曰順成南曰貞明北曰起鳳門各有樓穴水門於西為上水門

於東為下水門城之上有雉堞一千六十五外自
東南臨龍溪以西為文昌溪北底陵谷俱不設壕
奉化故未有城嘉靖壬子知縣蕭萬解始城之奉
化縣志萬厯間城多火菑知縣樊穀因民之請移
築山下城南門縣治正南

國朝順治初知縣蔡周輔塞舊南門移東四十餘丈又
增築甕城戊戌知縣王真增雉堞厚二尺高四尺
名城之東門曰太乙西曰金嶂南曰薰時北曰拱

極康熙十二年知縣曹鼎臣改今址仍舊制也二十三年夏南城門災各門樓俱圯二十五年知縣施剿曾重建四門修築雉堞

鎮海縣城池 嘉靖定海縣志薄海為城東連招寶山出浹口南環以江北負巨海西通於鄞距郡東六十二里高二丈四尺址廣一丈面八尺周圍一千二百八十八丈延袤九里闢五門東曰鎮遠南曰南薰又南曰清川西曰武寧又西曰向辰門各

有樓新設望海樓於北俱有弔橋羅以月城城之
上有敵樓十雉堞二千一百八十五警鋪三十九
外為壕自東抵西環九百六十六丈北際海不設
初城築於錢鏐歷元而隳洪武元年千戶王及賢
始立木柵七年守禦千戶端聚易以石二十年信
國公湯和建衛拓而大之周九里有奇關門為六
各建以樓上加雉堞警鋪外羅以月城惟小南門
無月城二十九年指揮劉澄增置永樂十三年都

指揮余成以北抵海塞北門舊穴水門於城西今
改置小南門之右嘉靖十二年都指揮劉翺加增
雉堞三尺三十三年知縣宋繼祖就城之北面增
建望海樓舊浙江通志萬厯三十六年知縣黎民
表修葺

國朝順治十五年增高并堵重造敵樓警鋪

觀海衛城

嘉靖寧波府志東北巨海西峙虎山背
負浪港山南面五磊諸山距郡西北百

十五里高二丈四尺址廣三丈延袤四里關東南
西北四門外設吊橋門各有樓羅以月城雉堞一

千三百七十敵樓二十八警鋪三十六外為壕九
百十四丈城始於洪武二十年信國公湯和以慈
谿縣塗田建築永樂十六年都指揮谷祥增崇之
國朝康熙十年奉檄重修

龍山所城

咸化四明郡志郡治北七十里明洪武
二十年信國公湯和以定海縣龍頭場

石塘圍之址築城鑿池建門一永樂十六年都指
揮谷祥增高八尺嘉靖寧波府志龍山背海面山
左亘覆船山右為望野高二丈五尺址廣二丈延
袤三里闊東南西北四門門各有樓設吊橋於東
西南三門之外羅以月城雉堞八百五十六敵
樓警鋪各二十外四周為壕五百六十二丈

威遠城

嘉靖寧波府志招寶山雄據海口與竹山
對峙為江海之咽喉郡治之門戶誠保障

要害處也先是盧鏜以參將分守東浙又進鎮守
都督屢平倭難備知甌塞與海道副使譚綸請於

總督胡宗憲於招寶之巔建築城堡發漁稅千金
卜日鳩工三閱月而告竣城凡二百丈高二丈二
尺厚一丈雉堞一百六十七東西為門二內建戍
屋四十餘楹調兵以守扼截海口以壓敵衝與縣
城唇齒相應因名咸遠城

國朝順治十五年增高併堵

穿山所城

成化四明郡志郡治東南一百五十里
定海縣海晏一都地名穿山洪武二十

七年安陸侯視其地濱海衝要立城於此二十八
年千戶邵通關四門羅以月城穴水門於南門之
側東北二門置樓周城列窩鋪跨山為迤永樂十
二年都指揮俞成開墾道二十六年都指揮谷祥
加修

國朝順治十八年以城址跨山空闊遂築而小之周三

百九十五丈延袤二

里有奇高如舊

霸霽所城

成化四明郡志郡治東南一百八十里定海縣海晏三都地名霸霽洪武二十

年信國公湯和築城鑿池闢南西北三門雖以月城其東為水門各冠以樓置弔橋復置瞭遠樓於山城列窩鋪永樂十五年都指揮谷祥加修增築置敵樓塞水門嘉靖寧波府志霸霽南匯大江自南徂東為渤海西接育王山北負穿山城高一丈九尺址廣一丈周四百八十八丈延袤三里有奇外東至西北凡三百七十四丈為壕南至西山一百三十二丈為塹倍壕三百七十丈

象山縣城池

嘉靖寧波府志象城北依象麓南麗

鯨波東迴文峰西迴丹嶠距郡東南二百七十一

里高一丈六尺址廣二丈面廣一丈周一千八百

九丈有奇延袤五里闢為四門東曰賓陽南曰來
薰西曰迎恩北曰拱極門各有樓穴水門於北門
之右南門之兩旁凡三門雉堞一千二百三十一
敵臺二十四警鋪如之外自西水門至東為壕自
東門而北至西南門之東為塹象自建縣以來未
有城嘉靖壬子夏縣令毛德京力請成城邑人周
希程為之記

昌國衛城

成化四州郡志郡治南三百五十里地名後門洪武十二年先於昌國縣開設

昌國守禦千戶所十七年改昌國衛二十年起造
海島居民革昌國縣以本衛移置象山縣三都海
口東門二十七年因東門懸海水薪不便徙後門
指揮武勝築城鑿池闔東西南北四門惟北無月
城穴水門於西南二門之側永樂十五年都指揮
谷祥重加修浚嘉靖寧波府志成化間指揮張勇
又繕葺之嘉靖三十二年倭寇入據後統兵梁鳳
加崇馬舊浙江通志城高二丈三尺址廣一丈延
袤七里城上有雉堞敵樓警鋪外為壕二百
一十六丈其西北九百一十丈依山不設

石浦所城

成化四明郡志郡治南三百七十一里
地名石浦舊隸昌國衛洪武二十年因

本衛移置東門將石浦原設巡檢司徙於象山縣
遂調前後二千戶所於石浦築城鑿池闔南西北
三門各冠以樓外羅月城穴二水門於西南二門
之側永樂十五年都指揮谷祥重加修浚嘉靖寧

波府志嘉靖三十四年

統兵梁鳳又加完葺

錢倉所城

成化四明郡志郡治南二百六十一里地名錢倉洪武二十年千戶王普築城

鑿池闢東南西北四門各冠以樓穴水門於西門之側外羅月城永樂十四年千戶徐昇增修嘉靖寧波府志嘉靖三十二年統兵劉恩至加葺舊浙江通志高二丈六尺址廣一丈三尺延袤三里外設弔橋城上有雉堞敵臺警鋪外為壕六百丈餘二十丈阻山不設令改為寨設營房三百六十間

爵溪所城

成化四明郡志郡治二百七十一里地名爵溪洪武三十一年千戶王恭築城

鑿池闢東西南三門各冠以樓外羅月城於東西二門永樂十五年千戶翟通增砌城堞嘉靖寧波府志成化間指揮張勇更葺嘉靖三十三年統兵劉恩至重修舊浙江通志高二丈八尺址廣三丈

延袤三里設弔橋於南門外城上設雉堞敵樓警鋪外為壕三百二十丈

定海縣城池 定海縣志在東海洲中唐開元置翁

山縣無城宋熙寧六年改翁山曰昌國始築城鑿池建炎中城毀明洪武十二年增葺昌國城設立衛所指揮募成立城五百丈未就明年指揮許友展成之十七年信國公湯和徙昌國三鄉止存在城四里立二所四巡檢守之而徙衛於象山縣之東二十七年改隸定海衛仍故城命總師居守永

樂十五年都指揮谷祥加修正統八年戶部侍郎
焦宏以城大兵少裁東北隅二里存七里三十步
壕隨城廣城門凡四成化間指揮張勇葺之嘉靖
三十三年總兵梁鳳加崇焉萬厯十三年副總鎮
張可大增修

國朝康熙二十六年九月設立定海縣二十八年建造
城池循舊址築之周一千二百十六丈城高二丈
址廣一丈五尺羅月城四雉堞一千二百八十高

四尺立東西南北四門門上飛樓四窩鋪三十八
其南設水門一外為壕

浙江通志卷二十三